

BOSNA I HERCEGOVINA  
CENTRALNA IZBORNA KOMISIJA  
SREDIŠNJE IZBORNO POVJERENSTVO



БОСНА И ХЕРЦЕГОВИНА  
ЦЕНТРАЛНА ИЗБОРНА КОМИСИЈА

**U P U T S T V O**  
**o vrstama, načinu i rokovima za određivanje biračkih mjesta**

Sarajevo, april 2010. godine

Na osnovu člana 2.9 stav (1) tačka 2. i člana 1.5 stav (3) Izbornog zakona Bosne i Hercegovine («Službeni glasnik BiH», br. 23/01, 7/02, 9/02, 20/02, 25/02, 4/04, 20/04, 25/04, 52/05, 65/05, 77/05, 11/06, 24/06, 32/07, 33/08, 37/08 i 32/10), Centralna izborna komisija Bosne i Hercegovine je, na 14. sjednici, održanoj 27.04.2010., d o n i j e l a

## U P U T S T V O

### o vrstama, načinu i rokovima za određivanje biračkih mjesta

#### POGLAVLJE I. UVODNE NAPOMENE

##### Član 1. (Primjena)

Uputstvom o vrstama, načinu i rokovima za određivanje biračkih mjesta utvrđuju se: vrste biračkih mjesta, način i rokovi za određivanje biračkih mjesta, način saradnje između općinskih izbornih komisija, gradskih izbornih komisija Mostara i Banje Luke i Izborne komisije Brčko Distrikta Bosne i Hercegovine (u daljnjem tekstu: izborne komisije), Centralne izborne komisije Bosne i Hercegovine (u daljnjem tekstu: Centralna izborna komisija BiH) i organa za tehničko održavanje Centralnog biračkog spiska (u daljnjem tekstu: Agencija), te način saradnje između Centralne izborne komisije BiH i Ministarstva vanjskih poslova Bosne i Hercegovine (u daljnjem tekstu: Ministarstvo vanjskih poslova BiH) u određivanju biračkih mjesta u diplomatsko-konzularnim predstavništvima Bosne i Hercegovine (u daljnjem tekstu: DKPBiH).

#### POGLAVLJE II. VRSTE I NAČIN ODREĐIVANJA BIRAČKIH MJESTA

##### Član 2. (Vrste biračkih mjesta)

(1) Centralna izborna komisija BiH određuje biračko mjesto u DKP-ima BiH, gdje svoje biračko pravo mogu ostvariti birači koji su upisani u izvod iz Centralnog biračkog spiska za glasanje izvan Bosne i Hercegovine za glasanje u DKP-ima BiH.

(2) Izborne komisije, u pravilu, formiraju tri tipa biračkih mjesta, i to:

- a) **redovna biračka mjesta** gdje svoje biračko pravo ostvaruju birači koji glasaju za osnovnu izbornu jedinicu trenutnog prebivališta/boravišta;
- b) **biračka mjesta za glasanje u odsustvu** gdje svoje biračko pravo ostvaruju raseljena lica kod kojih se osnovna izborna jedinica za koju glasaju razlikuje od osnovne izborne jedinice trenutnog boravišta i
- c) **biračko mjesto ovlašteno za izdavanje nepotvrđenih glasačkih listića** gdje svoje biračko pravo mogu ostvariti birači koji su upisani u izvod iz Centralnog biračkog spiska za glasanje izvan BiH a na dan održavanja izbora zateknu se u zemlji, kao i redovni birači koji se ne nalaze na zaključenom izvodu iz Centralnog biračkog spiska i dodatku izvoda iz konačnog Centralnog biračkog spiska, a posjeduju važeći identifikacioni dokument iz člana 5.12 Izbornog zakona BiH i potvrdu o mjestu prebivališta.

**Član 3.**  
**(Određivanje biračkih mjesta)**

(1) Centralna izborna komisija BiH posebnom odlukom određuje biračka mjesta u DKP-ima BiH za provođenje izbora u Bosni i Hercegovini.

(2) Izborne komisije određuju biračka mjesta za provođenje izbora u Bosni i Hercegovini, u saradnji sa Centralnom izbornom komisijom BiH.

**Član 4.**  
**(Biračko mjesto)**

(1) Biračko mjesto je posebno uređen prostor gdje birači upisani u Centralni birački spisak iz tačno definiranih i grupiranih ulica s kućnim brojevima, odnosno osnovnih izbornih jedinica za koje glasaju u odsustvu, ostvaruju svoje biračko pravo, te se na njima nakon zatvaranja za glasanje na dan održavanja izbora vrši prebrojavanje glasova i konsolidacija rezultata (redovna biračka mjesta), odnosno prebrojavanje koverti s glasačkim listićima (biračka mjesta za glasanje u odsustvu i biračka mjesta ovlaštena za izdavanje nepotvrđenih glasačkih listića).

(2) Biračko mjesto u DKP-ima BiH je posebno uređen prostor gdje birači upisani u Centralni birački spisak za glasanje van Bosne i Hercegovine za glasanje u DKP-ima BiH ostvaruju svoje biračko pravo, te se na njima, nakon zatvaranja za glasanje, na dan održavanja izbora vrši prebrojavanje koverti s glasačkim listićima.

**Član 5.**  
**(Označavanje biračkih mjesta)**

(1) Biračka mjesta označavaju se u zavisnosti od tipa kojem pripadaju na sljedeće načine:

**a) Redovna biračka mjesta:**

1) pripadajući kod općine (001-200), oznaka entiteta ili Brčko Distrikta BiH (A, B, C), redni broj biračkog mjesta (001-499) i

2) naziv biračkog mjesta koji može biti naziv naselja ili mjesne zajednice u kojoj je smješteno; svako biračko mjesto mora imati različit naziv (npr. Biračko mjesto 133A001 Sokolje1, 133A002 Sokolje 2).

**b) Biračka mjesta za glasanje u odsustvu:**

1) pripadajući kod općine (001-200), oznaka entiteta ili Brčko Distrikta BiH (A, B, C), redni broj biračkog mjesta (501-599).

**c) Biračka mjesta ovlaštena za izdavanje nepotvrđenih glasačkih listića:**

1) pripadajući kod općine (001-200), oznaka entiteta ili Brčko Distrikta BiH (A, B, C) i tri slova N (NNN).

**d) Biračka mjesta za glasanje u DKP-ima BiH:**

1) oznaka DKPBiH (međunarodna slovna oznaka države u kojoj se nalazi DKPBiH) i redni broj biračkog mjesta (počevši 01), npr. biračko mjesto u DKPBiH u Austriji –A 01).

(2) Oznake entiteta i Brčko Distrikta BiH su sljedeće:

- A -Federacija BiH,
- B -Republika Srpska i
- C-Brčko Distrikt BiH.

#### **Član 6.**

##### **(Lokacije biračkih mjesta u Bosni i Hercegovini)**

(1) Lokacije biračkih mjesta ne mogu biti u vjerskom objektu, zgradi organa vlasti, zgradi koja je vlasništvo političke stranke ili u kojoj je sjedište političke stranke, zgradi koja je korištena kao mjesto za mučenja ili zlostavljanja, ili mjestu gdje se služi ili konzumira alkohol.

(2) Centralna izborna komisija BiH može promijeniti lokaciju biračkog mjesta ako utvrdi da se nalazi na lokacijama iz stava (1) ovog člana ili ako nije pogodna za glasanje.

(3) Pri određivanju lokacije biračkog mjesta izborna komisija treba da vodi računa o biračima s invaliditetom na način da osigura jednostavniji pristup biračkom mjestu.

(4) Izborne komisije najkasnije 15 dana prije dana održavanja izbora objavljuju mjesta određena za glasanje gdje birači mogu glasati.

#### **Član 7.**

##### **(Biračka mjesta u DKP-ima BiH)**

(1) Centralna izborna komisija BiH, najkasnije 65 dana prije dana održavanja izbora, donosi odluku o određivanju biračkih mjesta za glasanje u DKP-ima BiH gdje birači, upisani u Centralni birački spisak za glasanje van Bosne i Hercegovine za glasanje u DKP-ima BiH, mogu glasati.

(2) Centralna izborna komisija BiH određuje biračka mjesta iz stava (1) ovog člana prema broju birača upisanih u Centralni birački spisak za glasanje van Bosne i Hercegovine, a koji su registrirani za glasanje lično u DKP-ima BiH.

(3) Centralna izborna komisija BiH uspostaviti će biračko mjesto u DKP-u BiH, ako su se ispunili uslovi iz stava (2) ovog člana za glasanje lično u DKP-u BiH.

(4) U slučaju da se nisu ispunili uslovi iz stava (2) ovog člana za glasanje lično u DKP-ima BiH, omogućit će se glasanje poštom. Centralna izborna komisija BiH će ove birače obavijestiti poštom, najkasnije 65 dana prije dana održavanja izbora.

(5) Centralna izborna komisija BiH dostavlja odluku iz stava (1) ovog člana DKP-ima BiH, putem Ministarstva vanjskih poslova BiH, najkasnije 15 dana od dana donošenja odluke, kako bi na adekvatan način obavijestili birače upisane u Centralni birački spisak za glasanje van Bosne i Hercegovine za glasanje u DKP-ima BiH o tome gdje mogu glasati.

#### **Član 8.**

##### **(Sadržaj odluke)**

Odluka iz člana 7. stav (1) ovog uputstva sadrži sljedeće podatke:

- a) naziv DKP-a BiH i broj biračkog mjesta,
- b) ukupan broj birača koji glasaju na biračkom mjestu i
- c) mjesto za potpis i otisak pečata.

**Član 9.**  
**(Redovna biračka mjesta)**

- (1) Redovna biračka mjesta formiraju se pridruživanjem jedne ili više ulica s kućnim brojevima.
- (2) Izborne komisije formiraju ukupan broj redovnih biračkih mjesta i njihove lokacije uzimajući u obzir sljedeće kriterije:
- a) broj birača na određenom biračkom mjestu, u pravilu, može da bude do 800, a ne može biti veći od 1000;
  - b) biračka mjesta u osnovnoj izbornoj jedinici treba rasporediti tako da ne budu previše udaljena za birače koji glasaju na tom biračkom mjestu;
  - c) jedna ulica može biti dodijeljena na više biračkih mjesta tako što se određuje koji kućni brojevi u toj ulici pripadaju kojem biračkom mjestu, s tim da svi kućni brojevi u jednoj ulici budu dodijeljeni biračkim mjestima i
  - d) svaka ulica bit će dodijeljena odgovarajućem biračkom mjestu čak i u slučaju da u određenim ulicama nema prijavljenih birača.

**Član 10.**  
**(Birači kojima se ne može odrediti biračko mjesto)**

(1) Birači kojima se ne može odrediti biračko mjesto pridruživanjem ulica i kućnih brojeva biračkim mjestima zbog nepostojeće adrese dodjeljuju se biračkim mjestima koja, uz prethodnu saglasnost Centralne izborne komisije BiH, odredi izborna komisija na obrascu koji propisuje Centralna izborna komisija BiH, na osnovu provjere stvarne adrese prebivališta birača, a prema metodologiji koju utvrdi Agencija i Centralna izborna komisija BiH.

(2) obrazac za dodjelu birača biračkom mjestu sadrži:

- a) zaglavlje Centralne izborne komisije BiH, naziv izborne komisije i naziv, broj i lokaciju biračkog mjesta,
- b) prezime i ime birača,
- c) matični broj birača,
- d) adresu stanovanja birača,
- d) broj prethodnog i novog biračkog mjesta i
- e) potpis lica koje je obradilo podatke i potpis lica koje je odobrilo obradu podataka i otisak pečata.

**Član 11.**  
**(Biračka mjesta za glasanje u odsustvu)**

(1) Biračka mjesta za glasanje u odsustvu formiraju se prema osnovnoj izbornoj jedinici za koju birači glasaju, bez obzira na adrese (ulice i kućne brojeve) na kojima borave, i to tako da se jedna ili više osnovnih izbornih jedinica, odnosno sve osnovne izborne jedinice za koje se glasa dodijele određenom biračkom mjestu.

(2) U pravilu, na biračkom mjestu za glasanje u odsustvu ne bi trebalo da se nalazi više od 800 birača.

## Član 12.

### (Biračka mjesta ovlaštena za izdavanje nepotvrđenih glasačkih listića)

(1) Izborne komisije uspostaviti će jedno biračko mjesto koje će biti ovlašteno za izdavanje nepotvrđenih glasačkih listića za birače iz člana 2. stav (2) tačka c) ovog uputstva.

(2) Birači koji imaju pravo glasati nepotvrđenim glasačkim listićem glasat će na jednom od biračkih mjesta ovlaštenim za izdavanje nepotvrđenih glasačkih listića, koje će biti u okviru biračkog mjesta iz člana 11. ovog uputstva. Ako u osnovnoj izbornoj jedinici nije određeno biračko mjesto iz člana 11. ovog uputstva, biračko mjesto nalaziti će se na redovnom biračkom mjestu koje je najbliže sjedištu izborne komisije.

(3) Ovakvo biračko mjesto zadržati će oznaku koja je određena za biračko mjesto za glasanje u odsustvu, odnosno redovno biračko mjesto, s tim da će se dodati i oznaka predviđena za biračko mjesto određeno za izdavanje nepotvrđenih glasačkih listića.

## Član 13.

### (Dodatno označavanje biračkih mjesta)

(1) Ako izborna komisija nije u mogućnosti da se iz tehničkih razloga pridržava kriterija utvrđenih u članu 9. stav (2) tačka a) i članu 10. stav (2) ovog uputstva, samo u slučaju da nije izvršena numeracija brojeva ulice ili naseljenog mjesta, odnosno da su svi brojevi *bb* i u posebnim slučajevima koje odobri Centralna izborna komisija BiH, za ovo biračko mjesto formirati će se dva ili više biračkih mjesta koja će zadržati istu oznaku ali će se dodatno označiti slovima abecede (a, b ...). Na ovim biračkim mjestima birački spisak bit će podijeljen po abecednom redu.

(2) Optimalne podjele biračkog spiska po abecednom redu određuje Centralna izborna komisija BiH, o čemu donosi posebnu odluku. Prilikom podjele, Centralna izborna komisija BiH vodi računa da na tako podijeljenom biračkom spisku bude približno jednak broj birača i da se svi birači kojima prezime počinje istim slovom nađu na istom biračkom spisku.

(3) Na ovako podijeljenim biračkim mjestima angažiraju se zasebni birački odbori, a prebrojavanje glasova, odnosno koverti s glasačkim listićima kao i konsolidacija rezultata vrši se nezavisno, te su ova biračka mjesta organizaciono samostalna, ali, u pravilu, treba da se nalaze na istoj lokaciji.

## Član 14.

### (Uvid u podatke)

Centar za birački spisak će izbornoj komisiji dostaviti sve podatke neophodne za donošenje odluke o određivanju biračkih mjesta, a naročito:

- a) broj birača na svakom kućnom broju svake ulice na teritoriji njihove osnovne izborne jedinice,
- b) broj birača kompletne ulice sa svim kućnim brojevima i
- c) broj birača na svim biračkim mjestima poslije pridruživanja ulica i kućnih brojeva.

## Član 15.

### (Rok za donošenje odluke)

(1) Centralna izborna komisija BiH, najkasnije 70 dana prije dana održavanja izbora, dostavlja izbornim komisijama obrazac odluke za određivanje redovnih biračkih mjesta i obrazac odluke za određivanje biračkih mjesta za glasanje u odsustvu.

(2) Obrazac odluke za određivanje redovnih biračkih mjesta sadrži sljedeće podatke:

- a) naziv i kod osnovne izborne jedinice,
- b) oznaku biračkog mjesta,
- c) naziv biračkog mjesta,
- d) nazive svih ulica s kućnim brojevima koje se pridružuju tom biračkom mjestu,
- e) ukupan broj birača koji glasa na biračkom mjestu,
- f) mjesto za potpis i otisak pečata i
- g) rubriku «Napomena».

(3) Obrazac odluke za određivanje biračkog mjesta za glasanje u odsustvu sadrži sljedeće rubrike:

- a) naziv i kod osnovne izborne jedinice,
- b) oznaku biračkog mjesta,
- c) naziv biračkog mjesta,
- d) nazive i kodove osnovnih izbornih jedinica koje se pridružuju biračkom mjestu,
- e) ukupan broj birača koji glasaju na biračkom mjestu,
- f) mjesto za potpis i otisak pečata i
- g) rubriku «Napomena».

(4) Izborne komisije, najkasnije 65 dana prije dana održavanja izbora, na propisanom obrascu, donose odluku o određivanju biračkih mjesta koju su dužne dostaviti Centralnoj izbornoj komisiji BiH, neposredno nakon određivanja biračkih mjesta sa spiskom lokacija biračkih mjesta.

### **POGLAVLJE III. ZAVRŠNE ODREDBE**

#### **Član 16. (Prilozi)**

Sastavni dio ovog uputstva je:

- a) obrazac za dodjelu birača biračkom mjestu iz člana 10. ovog uputstva,
- b) obrazac odluke o određivanju redovnog biračkog mjesta iz člana 15. stav (2) ovog uputstva i
- c) obrazac odluke o određivanju biračkog mjesta za glasanje u odsustvu iz člana 15. stav (3) ovog uputstva.

#### **Član 17. (Prestanak primjene)**


Danom stupanja na snagu ovog uputstva prestaje primjena Uputstva o vrstama, načinu i rokovima za određivanje biračkih mjesta za Lokalne izbore 2008. godine («Službeni glasnik BiH», broj 65/08).

#### **Član 18. (Stupanje na snagu i objavljivanje u službenim glasilima)**

Ovo uputstvo stupa na snagu narednog dana od dana objavljivanja u „Službenom glasniku BiH“, a objavit će se „Službenim novinama F BiH“, „Službenom glasniku RS“, „Službenom glasniku Brčko Distrikta BiH“ i web stranici Centralne izborne komisije BiH [www.izbori.ba](http://www.izbori.ba).

Broj: 05-1-02-2-2115 /10  
Sarajevo, 27.4.2010. godine

Predsjednica  
Irena Hadžiabdić



*Irena Hadžiabdić* 7







## OBRAZAC ZA DODJELU BIRAČA BIRAČKOM MJESTU

Izborna komisija \_\_\_\_\_

Biračko mjesto \_\_\_\_\_

(naziv i broj)

Lokacija biračkog mjesta \_\_\_\_\_

R.B.	IME I PREZIME	JMBG	ADRESA STANOVANJA	PRETHODNO BM	NOVO BM
1					
2					
3					
4					
5					
6					
7					
8					
9					

Podatke obradio \_\_\_\_\_  
(ime, prezime i potpis)

M.P. Podatke odobrio \_\_\_\_\_  
(ime, prezime i potpis)